

Kev ntsuam xyuas tus cwj pwm koj thiab

kev qhia kom koj tus:

Qhov cov niam cov txiv yuav tau paub

Functional Behavioral Assessment—Hmong Version

Tus sau: Dixie Jordan Tus txhais: Ntaub Xyooj

Coob tus me nyuam yeej muaj tus cwj pwm koj tsis tshua tus yeeb vim tus cwj pwm koj no yog ib feem ntawm lawv qhov tsis taus. Tej zaum tus cwj pwm koj li hais no yuav ua rau cov me nyuam kawm tsis tau ntawv zoo, yuav ua rau lawv rov ua raug lawv mob los sis ua raug lwm tus mob, los yog yuav ua rau lawv koom tsis tau nrog lwm tus me nyuam. Qee tus me nyuam yeej muaj tus cwj pwm koj uas tsis yog lawv txhob txwm ua, xws li tus me nyuam uas muaj lub suab qw ib rhe los sis tus me nyuam loj hlob qeeb uas nws pheej rov ua raug nws. Qee tus me nyuam yeej mluas mlob los sis ntxhov siab. Lwm tus me nyuam kuj tseem kawm tsis tau lub tswv yim los ua kom tau qhov nws xav tau ntawd yooj yim. Muaj ntau zaum mas, tej cwj pwm koj li no yeej ua rau cov me nyuam kawm tsis tau cov tswv yim uas yuav pab tau lawv lub neej.

Peb muaj cuab kav qhia cov me nyuam kom txawj koj zoo! Qhov peb yuav qhia tau mas, peb yuav tau to taub tias tus cwj pwm koj no zoo li cas, xws li lawv koj li no thaum lawv nyob qhov twg thiab yog vim li cas lawv thiaj koj li ntawd. Txoj kev kawm kom paub qhov cov me nyuam koj tsis tus no hu ua *kev tshawb xyuas tus cwj pwm koj* (Functional Behavioral Assessment, FBA). Yog peb kawm txog cov me nyuam tus cwj pwm koj thiab paub tias thaum twg thiab qhov twg tej cwj pwm koj no thiaj muaj tawm tuaj, peb yuav muaj cuab kav npaj qhia tau lawv kom koj tau tus cwj pwm tshiab zoo. Txoj kev qhia no hu ua *txoj kev qhia kom koj tus* (positive behavioral intervention). Cov kws qhia ntawv thiab cov niam cov txiv yuav muab qhov tshawb xyuas tau tus cwj pwm koj no los pab tus me nyuam sim koj tus cwj pwm tshiab. Lub hom phiaj kuj yog qhia kom cov me nyuam txawj tswj lawv tus kheej.

Qhov muab kev ntsuam xyuas koj los piav me ntsis no yog qhov yuav pab kom cov niam cov txiv to taub txog kev ntsuam xyuas tus cwj

pwm koj thiab kev qhia kom txawj koj tus. Koj muaj ib feem tseem ceeb nyob hauv txoj kev ntsuam xyuas no, vim koj yog tus paub txog koj tus me nyuam zoo tshaj lwm tus. Thaum koj paub txoj kev ntsuam xyuas koj tus me nyuam zoo lawm, koj yeej muaj cuab kav pab tau cov tib neeg uas yuav tuaj ntsuam xyuas koj tus me nyuam. Koj yuav paub txiav txim siab tias koj yuav ua li cas thaum tsev kawm ntawv qhia koj tias lawv xav ntsuam xyuas koj tus me nyuam. Tsev kawm ntawv yuav muab qhov koj paub txog koj tus me nyuam koj los pab tsim txoj kev qhia ntawv rau nws.

Xav txog tus cwj pwm koj

Cov laus yeej muaj ob txoj kev los daws qhov koj tsis tus. Ob txoj kev no kuj nyob ntawm qhov lawv ntseeg xwb vim ib tug yuav ntseeg txawv lwm tus. Ib tug yuav ntseeg tias tus me nyuam yog qhov teeb meem, lwm tus yuav ntseeg tias tus me nyuam muaj ib qho teeb meem.

Tus me nyuam yog qhov teeb meem

Billy muaj 12 xyoos thiab kawm nyob qib 6. Nws tsis kam ua nws cov ntawv nqa los ua hauv tsev ces nws tus kws qhia ntawv tsis pom qab yuav ua li cas. Nws tseem npau taws hlo thaum tus kws qhia ntawv hais kom nws kawm ntawv. Nws qw, nthe, thiab tseem muab nws cov ntawv cuam rau hauv pem teb kom tus kws qhia ntawv ntshai thiab txhob hais nws. Tus kws qhia ntawv yuav xav tias yog Billy tub nkeeg, siab phem, los sis tsis hwm lwm tus. Tej zaum tus kws qhia ntawv yuav npau taws thiab chim siab los muaj. Cov laus uas npau taws lawm kuj yuav rau txim rau tus me nyuam los sis hem kom nws ntshai, piv txwv li, “ua qhov no los yog yuav pom lwm yam.” Peb tsis faj tias cov me nyuam yeej tsis xav txog tus cwj pwm koj tsis zoo li qhov peb xav.

Thaum peb ho rau txim rau cov me nyuam

ntau zuj zus, lawv yuav pom tias peb tsis hlub lawv lawm thiab. Qee tus kuj yuav ntshai los yog tsis xav pom peb lawm. Lwm tus mas tseem yuav nthe nrov thiab npau taws hlo vim lawv raug txim lawm. Cov me nyuam uas pheej nrog cov laus cam ncauj mas yeej yog cov yuav mag lub txim nyhav dua. Cov laus coob tus xav tias qhov cia cov me nyuam cam kom yeej cov laus mas yog qhov tsis zoo. Hais lwm fab tuaj mas, cov me nyuam pheej lam tau lam hais vim lawv npau tawm lawm xwb. Txawm lawv tsis muaj cai hais los sis twb raug rho tawm hauv tsev kawm ntawv mus lawm los, lawv tseem yuav cam kom yeej.

Thaum ib tug me nyuam raug rho tawm hauv tsev kawm ntawv mus vim nws coj tsis tus, qee tus neeg xav tias qhov rho nws tawm no yog qhov “tshuaj los kho tus cwj pwm coj tsis tus”. Lawv xav tias qhov rho nws tawm ntawd yuav qhia kom nws paub tias nws yuav tau hloov nws tus cwj pwm coj tsis tus no.

Tab sis yog tias tus me nyuam ho tsis nyiam mus kawm ntawv ne ho zoo li cas? Nws yuav kawm tau tias qhov siv tus cwj pwm coj tsis zoo no yuav ua rau nws tau kev tawm hauv tsev kawm ntawv mus. Tej zaum tus me nyuam tseem nyiam qhov peb xav tias yog qhov rau txim kom nws paub no thiab.

Tus me nyuam muaj ib qhov teeb meem

Billy, tus me nyuam muaj 12 xyoos piav dhau los, muaj tus cwj pwm coj uas yuav tau hloov. Piv li tias, peb muab tau cov ntaub ntawv tshawb xyuas uas ua rau peb paub tias Billy yog tus neeg zoo li cas. Peb pom tias txawm nws twb kawm nyob qib 5 lawm los, nws tseem nyeem ntawv li cov kawm nyob qib 2. Nws raug cov neeg nyob ze ntawm nws tsev quab yuam nws ua dev ua npua thaum nws muaj 3 xyoos. Billy chim siab vim nws niam nws txiv tau sib nrauj lawm thiab tseem pheej sib txeeb yuav nws. Nws ntxhov siab tias nws yuav mus nyob qhov twg.

Qhov tseeb mas Billy yuav tau hloov nws tus cwj pwm coj tsis tus. Tus cwj pwm coj ntawd yeej tsis zoo thiab tseem ua rau nws kawm tsis tau ntawv. Txawm li ntawd los, qhov peb txiav txim siab tias yuav ua li cas rau qhov nws pheej coj li ntawd yuav los ntawm qhov peb xav li cas thiab ntseeg tias puas yog nws txhob txwm ua. Qhov no yog qhov yuav tau muaj kev ntsuam xyuas tus cwj pwm coj. Kev ntsuam xyuas no yuav pab tau peb txheeb kom pom tias yog vim lica Billy thiaj ntxhov siab thiab chim siab xwv peb thiaj pom qab pab qhia kom nws xyaum coj tau zoo. Ib tug neeg txawj xav hais tawm tias nws yuav ntseeg tsis tau yooj yim tias qhov cia li muab Billy rau txim xwb yuav qhia tau nws coj kom zoo mus.

Kev qhia kom coj tus

Coj tus: coj tau raws li qhov yog, yuav tau, los sis coj haum lwm tus.

Tus cwj pwm coj: qhov peb ua, qhov peb coj.

Kev qhia: qhov ua kom hloov tau qhov ua tawm los.

(Muab los ntawm phau keeb lus *Merrian Webster's Tenth Collegiate Dictionary*.)

Cov lus tswj hwm hauv Tsab Cai Kawm Ntawv Ntawm Tib Neeg Tsis Taus Xyoo

1997 tau hais tias:

Yog tias muaj ib tug me nyuam twg muaj tus cwj pwm coj uas yuav ua rau nws los sis lwm tus kawm tsis tau ntawv, yog tsim nyog lawm no ces, pab neeg uas muaj feem los npaj kev kawm ntawv rau nws yuav tsum xam txog cov kev qhia ntawv nrog rau tej kev qhia kom coj tau tus, thiab nrhiav cov kev pab los pab kom nws ho coj tau tus. *IDEA 300.346(2)(i)*

Kev qhia kom coj tus yuav tsum muab coj los qhia ua ntej thaum yuav muaj tus cwj pwm coj tsis zoo. Qhov yuav tsim kom tau txoj kev qhia kom coj tus mas, pab neeg npaj kev kawm ntawv yuav tsum to taub tias vim li cas tus me nyuam thiaj coj tsis tus thiab txoj kev qhia twg yuav qhia tau nws coj tau tus. Pab no yuav tsum muab ntau txoj kev cob qhia sib txawv los qhia kom nws hloov tau tus cwj pwm coj tsis tus nyob hauv tsev kawm ntawv, xws li: hloov qhov chaw nws zaum hauv chaw kawm ntawv, hloov cov ntaub ntawv nws kawm, qhuas nws thaum nws coj tau yog lawm. Tus kws qhia ntawv los yuav tau hloov nws lub suab lus kom los pab tus me nyuam ua tau lub siab txias. Cov laus los yuav tau ua lub siab ntev thaum tus me nyuam npau taws lawm. Lub hom phiaj kuj yog cheem los sis txo kom tau tus cwj pwm coj tsis tus kom txhob raug lub txim txhaum.

Piv txwv li: Tus kws qhia ntawv paub tias Mary yeej yuav cam nrog tus kws qhia ntawv thaum Mary zaum ze John. Tus kws qhia ntawv yuav ua tau ntau yam yog nws xav tias Mary yuav cam nrog nws vim Mary xav kom John tig ntsia Mary. Nws muaj cuab kav cais nkawv mus zaum kom deb xwv Mary thiaj tsis txhob txwm ua kom John tig los ntsia Mary. Nws tseem muaj cuab kav qhia tej kev coj zoo uas Mary yuav ua tau kom John tig ntsia thiab saib kom nws coj tau tej cwj pwm coj tshiab ntawd.

Coj li cas ces yuav tau txais li ntawd

John tau ntaus lwm tus (cwj pwm coj) thiab raug rho tawm hauv tsev kawm ntawv mus (lub txim txhaum/qhov tau txais). Yog John nyiam mus kawm ntawv thiab tswj tau nws

tus cwj pwm coj ces, qhov rho nws tawm mus kuj yog qhov tsis zoo rau nws vim nws yuav tsis tau ua tej yam nws nyiam ua nyob hauv tsev kawm ntawv lawm. Tiam sis, yog nws ho tsis nyiam mus kawm ntawv ces, nws yuav pom qhov rho nws tawm mus ntawd yog qhov nws nyiam. Nws tseem yuav kawm tau tias kev sib ntaus yog ib txoj kev ua kom tsev kawm ntawv muab nws xa mus tsev. Yog lwm zaus nws tsis xav nyob hauv tsev kawm ntawv ces, nws yeej paub tias nws yuav ua li cas lawm?

Peb coob tus yeej tos txog thaum twb muaj qhov coj tsis tus tawm tuaj lawm mas mam li nrhiav kev los daws. Tom qab ib tug me nyuam siv tus cwj pwm tsis zoo lawm ces, peb cia li muab nws rau txim xwb. Kev rau txim rau yeej qhia tsis tau txoj kev coj tus li. Lub hom phiaj ces yog txwv kom txhob muaj tus cwj pwm coj tsis zoo ntxiv xwb. Yog peb tsis qhia kom tus me nyuam coj li cas ces, ntshe nws yeej yuav coj li qub mus tas li. Thaum twg tus me nyuam siv tau ib tug cwj pwm los ua tau qhov nws xav tau lawm ces, nws yeej yuav ua li ntawd mus ntxiv. Tus cwj pwm no txia los ua ib tug yam ntxwv rau tus me nyuam.

Tib neeg feem coob yeej pom zoo tias peb yuav tsum muaj lub txim txhaum rau tej kev coj tsis zoo. Peb kuj yuav tsum xav txog qhov yuav qhia kom lawv coj tau zoo raws li qhov peb xam pom thiab. Yog peb twb muaj cuab kav to taub txog tus yam ntxwv coj tsis zoo, peb yeej qhia tau tus me nyuam kom muaj tus yam ntxwv coj zoo mus uas tsis tas yuav coj tej cwj pwm tsis tus ntawd ntxiv lawm.

Kev ntsuam xyuas tus cwj pwm coj yog dab tsi?

Kev ntsuam xyuas tus cwj pwm coj yog ib txoj kev tshawb xyuas tus cwj pwm coj ua ntaub ua ntawv cia. Pab neeg npaj kev kawm ntawv rau tus me nyuam yuav muab cov ntaub ntawv no los txheeb xyuas seb vim li cas thiaj muaj tus cwj pwm coj tsis tus no. Lawv tseem yuav muab cov ntaub ntawv no coj los pab nrhiav tej kev los daws txoj kev coj. Lawv yuav muab qhov lawv ntsuam xyuas tau no coj los tsim txoj kev qhia kom coj tau tus. Tsab cai kawm ntawv ntawm tib neeg tsis taus yeej hais kom muaj kev ntsuam xyuas tus cwj pwm coj thaum tsev kawm ntawv tau hloov tus me nyuam tsis taus qhov chaw kawm ntawv vim nws coj tsis tus. Qhov no kuj tsis hais tias peb tsis txhob hais txog kev ntsuam xyuas tus cwj pwm coj nyob rau lwm lub tsam thawj.

Kev ntsuam xyuas raws li tsab cai tau hais yeej qhia tseeb tias tsev kawm ntawv yuav tau ntsuam xyuas cov me nyuam “txhua yam uas tsam yog ib feem ntawm qhov tsis taus ua.” Qhov no txhais tau tias yog koj tus me nyuam muaj qhov coj tsis tus uas pheej hloov kho tsis tau ces, kuj yuav tau ntsuam xyuas koj tus me nyuam txoj kev coj tsis tus ntawd kom meej. Koj yuav hais kom muaj kev ntsuam xyuas tus

cwj pwm coj no thaum twg los tau yog koj tus me nyuam pheej coj tsis tus zuj zus, los yog thaum pab neeg npaj kev kawm ntawv rau koj tus me nyuam tsis muaj cuab kav piav tau rau koj tias vim li cas nws thiaj coj tau txawv li ntawd.

Kuj muaj ntau yam ua rau tus me nyuam coj tau tsis tus. Pa av, zaub mov, los sis soob ntoo tswv ua rau nws mob ces nws lam npau taws los muaj. Mob ci qhov muag, mob taub hau, los sis mob hniav los muaj cuab kav ua rau tib neeg npau taws tau. Qee tus me nyuam kuj muaj mob, xws li feeb tsis meej los sis txhoj puab dhau cai ces thiaj ua rau nws coj tau txawv. Pab neeg npaj kev kawm ntawv rau tus me nyuam qhov feem xyuas kuj yog los tshawb xyuas kom paub meej tias yog vim li cas nws thiaj coj tsis tus.

Cov tib neeg lis kev ntsuam xyuas tus cwj pwm coj yeej siv ntau txoj kev los tshawb xyuas. Cov lis dej num hauv tsev kawm ntawv yuav nrog koj thiab koj tus me nyuam tham. Lawv yuav soj xyuas koj tus me nyuam nyob hauv ntau qhov chaw, xws li qhov chaw noj mov los sis chaw kawm ntawv, los sis thaum tus me nyuam ua si nraum zoov. Lawv yuav nug cov kws qhia ntawv thiab lwm tus. Pab no yuav tig los xyuas tus me nyuam cov ntaub ntawv uas sau muaj tseg lawm, nrog rau tej kev tshawb xyuas yav tas los lawm uas koj xav muab coj los qhia rau sawv daws.

Qhov ntsuam xyuas tau no yuav muab tau ib qhov taw qhia tias vim li cas thiaj muaj kev coj tsis tus tawm tuaj. Qhov tawv qhia no tsuas yog qhov xav tias tsam yog li ntawd thiab hais raws li pab no tau tshawb pom los xwb. Qhov tshawb xyuas tau no yuav muab coj los tsim kev qhia kom coj tau tus mus.

Muaj tus cwj pwm coj raws li qhovtshwm sim

- Me nyuam hais lus tsis sib haum
- Muaj pis tsawg tus tub kawm ntawv hauv ib chaw kawm twg
- Muaj kev phooj ywg zoo li cas
- Chaw kawm ntawv dav li cas
- Hloov tshuaj noj
- Cov ntaub ntawv nws kawm ntawd nyuaj heev

Lwm yam uas yuav rau tus me nyuam coj tsis tus kuj yog cov nrog nws ua ke thiab qhov lawv xav kom nws ua. Thaum tus me nyuam chim los sis ua tsis tau raws li qhov nws xav tau lawm ces kuj yuav ua rau nws coj tsis tus los muaj.

Tus cwj pwm coj txia ua ib tug yam ntxwv

Tus cwj pwm coj tsis tus yeej ua tau ib tug yam ntxwv rau tus me nyuam los sis ua ib qho kev cia siab rau nws. Tej zaus peb yuav pom qhov tus me nyuam coj tsis tus thaum muaj ib tug kws qhia ntawv tshiab tuaj hloov nws tus kws qhia ntawv

me ntsis. Thaum zoo li no, peb yuav tau ua tib zoo saib thiab txhob rawm hais tias yog tus me nyuam tsis nyiam tus kws qhia ntawv ntawd los yog nws xav ua kom nws cov phooj ywg qhuas. Tej zaum tus me nyuam yeej nyiam tus kws qhia ntawv ntawd tiam sis ho chim tias ua li cas nws tus kws qhia ntawv uas tuaj qhia nws tas li ho tsis tuaj lawm. Los sis tus me nyuam ho txhawj txog qhov tus kws qhia ntawv tshiab xav kom nws kawm tau. Tus me nyuam uas chim siab vim muaj ib tug kws qhia ntawv tshiab tuaj yuav siv tus cwj pwm coj tsis zoo kom tus kws qhia ntawv muab nws mus kawm rau hauv chav txhob dhoo dhoo. Qee tus me nyuam yuav nyiam tawm mus kawm ib qho ntsiag to li kawm nyob hauv chav muaj coob tus kawm.

Qhov tiag ces, cov kev rau txim kom cov me nyuam feem coob coj tau tus ntawd kuj pab tsis tau rau txhua tus. Piv txwv li, xa tus me nyuam mus cuag tus thawj tswj tsev kawm ntawv kuj pab tsis tau yog tias lub txim txhaum ntawd tsis hais txog qhov pheej ua rau nws muaj tus yam ntxwv coj li ntawd.

Qhov tus me nyuam ua (coj) thiab vim li cas thiaj ua li ntawd (tus yam ntxwv) kuj yuav tsis zoo ib yam. Tsis mus kawm ntawv thiab kawm tau ntawv zoo yog ob qho cwj pwm coj tsis sib xws. Tiam sis, tej zaum ob qho no kuj ua ib tug yam ntxwv rau ob tug me nyuam - kom cov laus pom. Ob tug me nyuam yuav xav kom niam thiab txiv pom qhov nkawv ua; ib tug yuav rau siab kawm kom tau ntawv zoo hos lwm tus yuav tsis mus kawm ntawv. Nyias yeej ua nyias qhov kom tau qhov nkawv nyiam. Thaum nkawv muaj tus yam ntxwv ua kom niam thiab txiv pom li hais, qhov tsis mus kawm ntawv yeej tsis yog qhov zoo li.

Tej xwm txheej uas ua kom coj tau txawv (antecedents)

Qhov tshwm sim rau cov me nyuam hauv ib qho twg muaj cuab kav ua kom nws coj tau txawv. Qhov dav ntawm chav kawm ntawv, muaj pis tsawg tus tub kawm ntawv, kev hloov mus kawm dua ib qib, los sis lub tsheb caij mus kawm ntawv sib tsoo puav leej ua rau lawv coj tau txawv.

Qhov tseem ceeb mas yuav tsum paub qhov ua rau cov me nyuam coj tau tus thiab coj tsis tus. Yog cov kws qhia ntawv thiab cov niam cov txiv to taub qhov ua rau tus me nyuam coj tsis tus ces, kuj hloov kho qhov ntawd xwb los tej zaum yuav daws tau qhov coj tsis tus ntawd lawm. Cov kev qhia uas yuav pab kom cov me nyuam coj tau tus ntawd kuj yog tsim kom muaj qhov chaw muaj cai tuav, muaj tes dej num rau lawv ua, thiab muab kev qhuas rau lawv thaum lawv coj tau yog lawm kuj yuav txhawb kom lawv txawj coj zoo ntau ntxiv.

Txoj hau kev ntsuam xyuas tus cwj pwm coj

Tsab cai kawm ntawv ntawm tib neeg tsis taus yeej tsis teev tias yuav ntsuam xyuas tus cwj pwm coj li cas. Txoj kev ntsuam xyuas no yuav ua raws li qhov teeb meem tus me nyuam muaj xwb. Txawm li cas los, kuj muaj ntau qib yuav tau ua uas yog ib feem nyob hauv kev tshawb xyuas no. Txoj kev ntsuam xyuas no yuav tau pib tshawb xyuas tus cwj pwm coj uas yuav tau hloov. Yog tias ib tug me nyuam twg muaj ntau qhov coj tsis tus, qhov tseem ceeb mas kuj yuav tau xyuas ib ob qho coj tsis tus tshaj plawv ua ntej. Yuav tau muab qhov coj tau tsis tus coj los piav kom meej kom sawv daws to taub tias tus me nyuam coj tau tsis zoo li cas tiag. Qhov yuav tau ua yog:

1. Txheeb xyuas thiab nrhiav kom pom tus cwj pwm

uas yuav tau hloov sai.

2. Tshawb kom tau tias qhov coj li ntawd tshwm sim nyob rau qhov twg thiab qhov twg ho tsis muaj qhov coj li no lawm.

Txheeb xyuas qhov ua kom muaj tus cwj pwm no tawm tuaj. Pab neeg ntsuam xyuas tus cwj pwm coj no yuav tau nug tej lus hais mus no:

- Qhov chaw uas tsis muaj tus cwj pwm coj no ho zoo li cas tiag?
- Qhov chaw uas pheej muaj tus cwj pwm coj tsis tus tawm tuaj ho txawv li cas tiag? Puas yog vim tus tub kawm ntawv thiab tus kws qhia ntawv tsis sib haum es thiaj muaj tus cwj pwm coj no tawm los? Puas yog vim muaj tub kawm ntawv coob dhau los yog pheej muab ntaub ntawv rau nws kawm ntau dhau es thiaj muaj tus cwj pwm coj no? Puas yog vim lub sij hawm los sis tus me nyuam lub siab coj ua muaj tej cwj pwm no los? Puas muaj teeb meem hauv lus tsheb caij mus kawm ntawv los sis muaj kev tsis sib haum nyob hauv tsev kawm ntawv?
- Puas yog pheej muaj tus cwj pwm coj no nyob hauv ib qho chaw kawm ntawv twg los sis ib qhov chaw twg xwb? Tus xwm txheej dab tsi pheej ua kom muaj tus cwj pwm coj tsis tus no?

3. Muab cov ntaub ntawv qhia txog tus me nyuam txoj kev kawm tau ntawv hauv txhua qhov chaw los saib.

4. Sau ib qho taw qhia tias vim li cas thiaj muaj tus cwj pwm coj tsis tus (muaj tus cwj pwm nyiam ua). Qhov taw qhia no tsuas yog qhov xav tias tsam yog li ntawd, thiab tsuas hais raws li cov ntaub ntawv sau muaj tseg lawm xwb. Qhov no yuav pab kwv yees tau tias qhov twg thiab vim li cas thiaj muaj tus cwj pwm coj tsis tus ntau dua, thiab qhov twg thiab

vim li cas ho tsis tshua muaj tus cwj pwm coj tsis tus no.

5. *Txheeb xyuas tus cwj pwm coj uas yuav qhia tau* los ua tau tib tug yam ntxwv rau tus me nyuam.
6. *Muab qhov taw qhia no coj los sim.* Pab neeg npaj kev kawm ntawv yuav los tsim thiab siv qhov kev qhia kom coj tus uas tau muab sau tseg rau hauv tsab ntawv teev kev kawm ntawm tus kheej los sis hauv kev npaj daws tus cwj pwm coj.
7. *Ntsuam xyuas qhov kev qhia kom coj tus no seb ho pab tau li cas.* Hloov los sis kho txoj kev qhia no mus raws li qhov yuav ua tau.

Yog tias muaj cov me nyuam muaj tus cwj pwm coj uas yuav ua rau lawv los sis lwm tus raug mob, kuj tsim nyog muaj kev pab kho tus cwj pwm coj los pab lawv kom sai. Kev pab kho tus cwj pwm coj kom sai no yuav tau tsim kom muaj ua ntej thaum yuav muaj qhov teeb meem tawm los. Pab neeg npaj kev kawm ntawv yuav tsum pom zoo tias qhov coj li cas thiaj yog qhov yuav tau daws sai thiab lawv (thiab tus me nyuam) yuav tau ua li cas thaum cia li muaj teeb meem tawm los. Qhov muaj txoj kev los pab li no yuav ua rau cov kws qhia ntawv muaj cuab kav pab tau cov me nyuam thaum lawv muaj kev ntxhov siab heev.

Kev qhia kom coj tus

Txoj kev qhia kom coj tus (muaj ntsis hu ua kev txhawb kom muaj tus cwj pwm coj zoo los sis kev txhawb kom coj tus) yuav muab coj los qhia kom coj tau tus los sis txhawb qhov coj tau zoo lawm. Qhov tiag ces, pab neeg npaj kev kawm ntawv yog cov tsim txoj kev qhia no. Txoj kev qhia no yuav tsum muaj:

- Kev qhia lub tswv yim coj kom tau zoo ntxiv
- Kev hloov kho nyob hauv chav kawm ntawv los sis lwm qhov chaw kom txo tau los sis txhob muaj tus cwj pwm coj tsis tus
- Tej tswv yim los pab hloov tus cwj pwm coj tsis tus los coj kom tau zoo kom ua tau ib tug yam ntxwv rau tus me nyuam
- Kev txhawb nqa tus me nyuam kom nws coj tau tus cwj pwm zoo

Kev qhia kom coj tus tsis yog txoj kev npaj los txheeb xyuas qhov tshwm sim rau tus tub kawm ntawv uas tau ua txhaum txoj cai los sis txoj kev coj teev cia. Qhov txheeb xyuas qhov tshwm sim li hais no yuav hu tau tias yog kev qhuab qhia los sis kev teem lub txim txhaum.

Tsev kawm ntawv tsab cai qhuab qhia

Pab neeg npaj kev kawm ntawv yuav los txheeb xyuas saib puas tsim nyog muab tsev kawm ntawv txoj cai qhuab qhia

los kho kom haum tus me nyuam, los yog yuav tau muab qhov kev txhaum kho kom txawv qhov teev muaj hauv tsab cai. Kev txiav txim siab tias yuav yuav li cas yuav los ntawm txoj kev ntsuam xyuas no thiab kev tig xyuas tej ntaub ntawv muaj tseg lawm, nrog rau tej ntaub ntawv uas tsev kawm ntawv sau txog kev qhuab qhia los sis tej kev sib tham xyuas seb puas yog tus me nyuam lam txwm ua. Tus me nyuam tsab ntawv teev kev kawm ntawm tus kheej los yog kev txhawb kom coj tus yuav tsum hais txog kev qhia lub tswv yim los coj zoo xwb.

Qee tsam mas tsev kawm ntawv tsab cai qhuab qhia kuj daws tsis tau tus cwj pwm coj tsis tus. Qhov ntawd yog, lub txim uas cov lis dej num hauv tsev kawm ntawv tsis pub nws tuaj kawm ntawv hnuv puav ntawd yeej ua rau nws kawm tsis tau dab tsi. Tus me nyuam tseem kawm tau tias qhov coj tsis tus ntawd tseem yog qhov ua kom tau qhov nws nyiam, xws li yog qhov ua kom tej phooj ywg pom tias nws ua tau heev. Thaum qhov no yog qhov tseeb lawm ces, kuj yuav hais tsis tau tias qhov rau txhim rau yog qhov siv los hloov tau tus cwj pwm coj tsis tus.

Ib co lus tseem ceeb uas cov niam cov txiv yuav tau nug thaum lawv txhawj txog qhov yuav muab coj los qhuab qhia tus me nyuam yog “Cov ntaub ntawv sau cia hais tias kev qhuab qhia li hais yeej siv tau ntawd nyob qhov twg?” Kev txiav txim siab hauv kev kawm ntawv tshwj xeeb yog los ntawm cov ntaub ntawv sau cia. Yog cov lis dej num hauv tsev kawm ntawv xav siv ib txoj kev qhuab qhia twg, lawv yuav tsum tshawb xyuas cov ntaub ntawv uas yeej sau muaj cia lawm tias qhov kev qhia ntawd yeej pab tau. Piv li tias, yog tsev kawm ntawv pheej tso koj tus me nyuam tawm hauv tsev kawm ntawv mus vim nws coj tsis zoo, qhov tso tawm no puas qhia tau tej tswv yim rau tus me nyuam kom coj zoo?

Cov cai txwv tsis pub ua phem (zero-tolerance policies)

Ntau koog tsev kawm ntawv yeej muaj cov cai txwv tsis pub ua phem thiab tej cai no yeej tau teev lub txim txhaum tseg rau ib qho kev txhaum twg. Cov cai li hais kuj muab tsis tau qhov txim uas yuav pab tau rau cov ua txhaum txoj cai. Yog ib tug me nyuam tsis taus tau ua txhaum tsab cai no, tej zaum qhov txim ntawd yuav pab tau los sis yuav pab tsis tau kom nws ho kawm tau tias qhov nws ua ntawd tsis yog lawm. Lub txim uas muab rau qhov tus me nyuam tsis taus tau ua txhaum yuav tsum yog qhov ncaj ncees, tsis muaj qhov ntxub ntxaug txog nws qhov tsis taus. Pab neeg npaj kev kawm rau tus me nyuam muaj feem los xam xyuas seb puas tsim nyog txhob rau txhim rau tus tub kawm ntawv li qhov cov cai tau teev cia, los yog yuav tau muab ib qho txhim rau tus tub kawm ntawv kom txawv dua li qhov cov

cai qhuab qhia hauv tsev kawm ntawv tau teev cia. Tej zaum yuav tau muab cov hom phiaj qhia kev coj los sau rau hauv tsab ntawv teev kev kawm ntawm tus kheej los pab daws qhov teeb meem uas tus me nyuam yuav ua tsis tau raws li cov cai qhuab qhia tau teev tseg.

Txawm cov tswj hwm tsev kawm ntawv yuav tsis xav kom muaj qhov zam tau nyob hauv cov cai qhuab qhia rau txhua tus tub kawm ntawv los, qee tsam mas yuav tau muaj qhov zam tau thiab thiaj zoo. Qee tus tub kawm ntawv uas tsis muaj cuab kav coj tau tus cwj pwm raws li qhov tsev kawm ntawv teev cia yuav tsum tau qhov kev txhaum tus kheej uas yuav txhawb kom muaj tus cwj pwm coj zoo mus ntxiv.

Txoj kev cai lij choj nyob hauv teb chaws America mas, lub txim uas muab rau tus tau ua txhaum txoj cai yog los ntawm kev ntsuam xyuas tus xwm txheej raws li qhov tau ua txhaum. Tiam sis mas tsev kawm ntawv tsuas muaj ib txoj cai qhuab qhia rau tsoom tub kawm ntawv txhua tus, tsis hais txog qhov yuav pab tau ib tug twg li. Tej zaum lawv yuav muab tib lub txim rau txhua tus los muaj. Cov niam cov txiv yuav tau ua tib zoo saib tsev kawm ntawv txoj cai qhuab qhia kom meej seb puas tsim nyog muab lub txim txhaum coj los kho kom raug raws li qhov lawv tus me nyuam tau ua.

Cov kev qhia kom coj tus

Tsev kawm ntawv siv cov kev qhia hais mus no los pab kom cov me nyuam txhob muaj tus cwj pwm coj tsis tus thiab qhia kom lawv txawj coj tus.

Nres, so, thiab xav tso qhia kom cov me nyuam xav txog qhov teeb meem lawv muaj thiab yuav daws tau li cas. Cov me nyuam kawm txog qhov lawv ua tau raws li nram no:

1. Txheeb xyuas qhov teeb meem.
2. Txiaiv txim tias leej twg yog tus tsim qhov teeb meem.
3. Xam txog ntau txoj hau kev los daws qhov teeb meem.
4. Xaiv ib txoj hau kev los sim daws qhov teeb meem.
5. Siv txoj hau kev daws qhov teeb meem no.
6. Ntsuam xyuas seb puas daws tau.

Tom qab cov me nyuam to taub txog qhov lawv ua tau no lawm, qhov sim ua thiab xyaum ua yuav pab kom lawv swm coj li no. Kev pab kom cov me nyuam xam pom qhov lawv yuav daws tej kev txob siab (xws li muab ob txhais tes sib tuav, ceev lub suab hais lus, thiab lwm yam) yuav yog ib feem ntawm txoj kev qhia los siv txoj kev daws teeb meem li hais no kom zoo.

Ua txuj tsis hnov yog qhov siv tau los cheem tus cwj pwm ua txob neeg. Piv txwv li, qhov no yuav siv tau rau thaum muaj

tus tub kawm ntawv pheej qw los sis pheej txob lwm tus kom tus kws qhia ntawv tig los chawj nws, los sis qhov no yuav siv los daws qhov cov tub kawm ntawv tsis npaj mus kawm ntawv ua. Qhov ua txuj tsis hnov qhia tias qhov cov me nyuam coj tsis tus yog ib qho kev ua los txob neeg xwb. Yog tias ib tug lam coj tus cwj pwm tsis tus kom cov laus chawj xwb ces, qhov ua txuj tsis hnov no yuav ua rau nws paub tias qhov coj li ntawd yuav tsis taus. Thaum tsis muaj tus quav ntsej lawm ces qhov coj li no yuav ploj zuj zus thiab yuav tsis muaj lawm. Cov niam cov txiv yuav siv tau qhov ua txuj tsis hnov no rau tej cwj pwm uas tsis txaus hais xws li qhov tus me nyuam cia li lam npau taws. Coob tus laus yeej ua tsis tau lub siab ntev li yog thaum pheej muaj tus txob qhov lawv sam sim ua. Tsis tas li, qhov pheej ua kom lwm tus chawj ntawd tseem yuav muaj ntau ntxiv ua ntej thaum yuav ploj mus.

Qhov ua txuj tsis hnov kuj siv tsis tau rau tej kev coj uas pheej txob dhau heev lawm. Yog tseem muaj lwm cov me nyuam cia li luag rau qhov ib tug laus tsis quav ntsej txog qhov ib tug me nyuam ua thiab ces qhov ua txuj tsis hnov no kuj haj yam yuav siv tsis tau. Qee qhov cwj pwm coj tsis tus ntawd tseem yuav phem zuj zus ntxiv xws li qhov ua kom raug lwm tus los yog cov hluas tej teeb meem uas tseem muaj qhov sib cav sib ceg nrog. Qhov cia li ua txuj tsis paub tias muaj tej kev coj tsis tus no los ntshe yuav ua tsis tau. Tsis txhob siv qhov ua txuj tsis hnov rau tej kev coj uas yuav ua raug lwm tus. Qhov ua txuj tsis hnov no yuav siv tsis tau thaum cov me nyuam loj lawm thiab thaum lawv nyiam nrog lawv tej phooj ywg tshaj li qhov lawv nrog cov laus.

Cheem ntsiag to (los yog txhob tham lus) yuav qhia rau tus me nyuam paub tias qhov nws sam sim ua ntawd yuav tsis tau. Cov kws qhia ntawv los sis cov niam cov txiv yeej siv tau qhov ntxais qhuav hniav, co taub hau, ntsia, taw tes rau lub rooj thaum tus me nyuam pheej sawv mus los, los sis co tes kom tus me nyuam tsum los sis txhob ua li ntawd. Thaum siv qhov txhob tham lus no mas, tsis txhob ua tus luag nyav los sis ua tus txaus siab li. Qhov cheem kom txhob ua li hais los no yuav siv tau ua tej qib zuj zus los kuj nyob ntawm qhov tus me nyuam coj thiab ho muaj tej cwj pwm no tshwm sim ntau npaum li cas los yog coj tau tsis zoo li cas. Piv txwv li, qhov co tes kom txhob ua yuav siv tau thawj ib ob zaug, tiam sis yuav tau ntsia los co taub hau ntxiv yog pheej ua ntxiv mus.

Txav kom ti txhais tau tias tus kws qhia ntawv los sis ib tug laus txav mus kom ti tus me nyuam raws qhov zoo. Yog kws qhia ntawv siv qhov cheem ntsiag to no los cheem tsis tau tus me nyuam ces nws yuav tsum txav mus kom ze tus me nyuam thiab qhia kom nws tsis txhob ua li ntawd.

Tuav yog ib qho qhia kom coj zoo uas tsis tas yuav hais lus

li, txhais tias maj mam tuav kom txhob nti. Qhov tuav li no siv los qhia kom tus tub kawm ntawv coj zoo mus. Piv txwv li, tus kws qhia ntawv maj mam tuav tus me nyuam lub xub pwg thiab coj nws mus zaum nws qhov chaw. Qhov tuav li hais no yuav siv tsis tau rau cov me nyuam uas twb chim heev dhau lawm los sis thaum tsev kawm ntawv txoj cai txwv tsis pub tuav li no lawm. Qhov tuav li hais no yuav siv tsis tau yog tsev kawm ntawv twb muaj cov ntaub ntawv sau cia hais tias tus tub kawm ntawv yeej tau ua phem, raug quab yuam los sis tsis muaj leej twg hlub, muaj lub siab quaj dawv dhi, los sis muaj kev ntxhov siab heev los lawm, txawm yuav siv tau los yuav tsum yog cov kws kho mob los sis cov kws tshawb kev txawj ntse pom zoo hais tias siv tau no thiab.

Hais txaus luag. Muab tus kws qhia ntawv los sis muab qhov teeb meem, txhob hais txog tus me nyuam li, coj los hais kom txaus luag kuj yuav txo tau qhov kev chim thiab tig tau cov me nyuam los xav rau qhov zoo. Txhob siv qhov hais txaus luag los ua kom tus me nyuam txaj muag, los sis txhob siv los ua li qhov yuav ua rau lwm tus thuum tau tus me nyuam.

Ceeb toom ntsiag to yuav ua rau tus me nyuam muaj lub caij los tswj tau nws tus kheej yam tsis tas yuav cem nws tib leeg xwb. Piv txwv li, tus kws qhia ntawv muab ib daim me ntawv muaj kob pov rau ntawm rooj thaum nws ncig los txog, los sis tsa ntiv tes hais qhia raws li txoj cai hais tias nws ua dhau cai lawm.

Coj mus qhuab qhia rau ib qhov chaw ntsiag to. Coob tus me nyuam tsis nyiam qhov kws qhia ntawv cia li hais lawv rau sawv daws pom. Tab txawm cov laus muab lawv rau txim tag lawm los, me nyuam yeej yuav chim mus tas li. Qhov cov hluas cia li ua tus tsis paub dab tsi li thaum tus kws qhia ntawv hais lawv rau sawv daws pom ntawd yuav ua rau lawv cov phooj ywg pom tias lawv muaj peev xwm tiag. Ib tug me nyuam yuav mloog raug qhov kws qhia ntawv qhuab qhia thaum tsis muaj nws cov phooj ywg nyob ntawd.

Ua tib zoo hais yuav qhia rau cov me nyuam paub tias yuav tau coj zoo thiaj tau qhov zoo. Lo lus mas yeej yooj yim hais, tiam sis qhov nqis tes ua mas kuj tsis yooj yim. Cov kws qhia ntawv thiab cov niam cov txiv yeej muaj ntsis hais txog qhov coj tsis tus xwb. Hais qhia cov me nyuam txog qhov yuav raug cem thaum lawv coj tsis tus kuj yuav yooj yim hais dua li qhov ua tib zoo hais tias thaum coj zoo ho yuav tau qhov zoo li cas. Hauv qab no yog muab qhov ua tib zoo hais piv rau qhov pheej cem:

Ua tib zoo hais: “Yog koj nyeem tas ua ntej thaum lub caij so kawm ntawv ces, peb kuj tawm tau mus nraum zoo thiab tau ua si.”

Hais cem: “Yog koj nyeem tsis tas ua ntej thaum lub caij so kawm ntawv ces, koj yuav tsis tau tawm mus nraum zoov kom txog thaum koj nyeem tas.”

Ua tib zoo hais yuav pab tau cov me nyuam kawm tau tias qhov coj zoo yuav coj lawv mus ua tau qhov zoo. Li no ces, kuj yuav ua rau lawv muaj cuab kav pab tswj tau lawv tus kheej.

Siv lo lus “Kuv”, raws li qhov Thomas Gordon qhia tawm hauv nws phau ntawv nws sau hauv xyoo 1974 txog kev xyaum los mus qhuab qhia me nyuam rau cov kws qhia ntawv mas qhov **siv lo lus “KUV”** no hais yuav pab kom cov me nyuam kawm tau tias qhov coj tsis zoo ntawd yuav txob lwm tus li cas. Phau ntawv no tseem qhia tau qhov tseem ceeb tias nyias yuav tau muaj feem xyuam rau qhov nyias ua. Piv txwv li, cov niam cov txiv thiab cov kws qhia ntawv yuav siv cov lus hais tias “Kuv chim lawm thaum...” tsis txhob hais tias “Koj yog neeg phem thaum...”

Thaum ib tug me nyuam twg muaj kev sib raug zoo nrog nws niam nws txiv thiab cov kws qhia ntawv, **siv lo lus “kuv”** no hais muaj cuab kav pab kom nws to taub tias qhov coj tsis zoo ntawd ua rau cov laus xav li cas. Yog tus me nyuam tsis nyiam nws tus kws qhia ntawv ces, qhov siv lo lus “Kuv” no kuj muaj teeb meem. Tej zaum qhov siv lo lus no tseem yuav ua kom tus me nyuam txob tau tus kws qhia ntawv ntxiv thiab los muaj.

Hloov kho tus cwj pwm qhia tias tsis yog txhua tus me nyuam yuav ua tau txhua yam 100 tim 100. Yog tus me nyuam tsis nqa nws cov ntawv nqa los ua hauv tsev tuaj txhua hnuv ces qhov hais kom nws nqa cov ntawv ntawd tuaj txhua hnuv kuj tsis yog qhov nws ua tau. Txawm cov me nyuam ua tau me me los yuav tau muab kev zoo siab rau lawv thiab muab kev txhawb kom lawv ho ua tau mus ntxiv ces yuav ua rau lawv kawm tau tias lawv yuav tau lis tes dej num thiab yuav tau xyaum kom txawj ntxiv.

Qhia tes dej num thiab qhia qhov xav tau rau kom meej yuav qhia cov me nyuam paub tias lawv yuav kawm dab tsi tag kis xwv lawv thiaj tsis txhawj los sis tsis ntshai. Cov kws qhia ntawv uas yeej muab cov cai lo rau qhov chaw sawv daws pom thiab piav rau sawv daws txhua hnuv yeej muab tau qhov xav kom cov tub kawm ntawv yuav tau coj li cas rau hnuv ntawd.

Xav paub kev qhia kom coj tus thiab kev ntsuam xyuas tus cwj pwm coj los sis xav tau lwm cov ntaub ntawv, thov hu rau:

Koom Haum Niam Txiv Thoob Tswv Yim txog Cai Kawm Ntawv

PACER Center

8161 Normandale Boulevard

Minneapolis, MN 55437-1044

Tus xov tooj ua lus hais yog 952-838-9000

Tus xov tooj xa ntawv yog 952-838-0199

Tus xov tooj ntau ua ntawv hais yog 952-838-0190

Tus xov tooj hu tau dawb hauv xeev MN yog 800-537-2237

E-mail yog pac@pac.org

Web site: www.pacer.org

www.fape.org

www.taalliance.org

Center on Positive Behavioral Interventions and Supports

1761 Alder Street

1235 College of Education

Eugene, OR 97403

Tus xov tooj yog 541-346-2505

E-mail: pbis@oregon.uoregon.edu

Web site: www.pbis.org

American Institute for Research

3333 K Street NW

Washington, DC 20007

Tus xov tooj yog 202-944-5300

Web site: www.air.org